

Date – 27/02/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Chief Minister Pu Lalduhoma'n The Mizo Marriage and Inheritance of Property (Amendment) Bill, 2026 chu sorkar tih ni hran lovin pawl hrang hrang 10 aiawh te awmna Mizo hnam dan review committee rawtna an pulut mai a ni a ti.
2. MHIP-in The Mizo Marriage and Inheritance of Property (Amendment) Bill, 2026 chu Mizo hmeichhia te tan tha tawk lo nia sawiin sut a, siamtha leh turin an phut tih an sawi.
3. Vawiin Assembly Session chuan Congress MLA Pu C. Ngunlianchunga private member resolution `hmeichhia chu 'mi nu' ti a thlak ni rawh se tih chu hnawl a ni.
.
4. Delhi excise policy eiruk thubuaiah Delhi court-in Aam Aadmi Party National Convenor, Delhi Chief Minister hlui ni bawk, Arvind Kejriwal-a leh midangte thiam a chan tir.



CM

Chief Minister Pu Lalduhoma'n tunhnaia Dan an siamthat social media-a sawi hlawh tak, The Mizo Marriage and Inheritance of Property (Amendment) Bill, 2026 chu sorkar tih ni hran lovin pawl hrang hrang 10 aiawh te awmna Mizo hnam dan review committee rawtna an pulut mai niin a sawi.

He thu hi vawiina Congress MLA Pu C. Ngunlianchunga private member resolution sawihona hunah sawiin, Chief Minister chuan Thawhlehnia an pass tak The Mizo Marriage and Inheritance of Property (Amendment) Bill, 2026, chu sorkar tih ni hran lovin, Central YMA, MUP, MHIP, Council of Churches in Mizoram, Mizoram kohhran hruaitute committee, Mizoram Women's Commission, Mizoram Law College, Mizoram Bar Association aiawhte bakah MZU mithiamte, leh officialte telna Mizo hnam dan review committee rawtna an pulut mai a nih thu a sawi a. Mizo hmeichhia in hnamdang pasal a neihin a Mizona a chan tih chu a dik lohna em em a awm lo tih sawiin, a Mizona a chan avangin a fate pawhin Tribal nihna an nei thei tawh lo a ni a ti a, Mizo hmeichhiaten hnamdang pasal an neihin Tribal an ni zui zel ang em tih chu Mizo hnam dan chuan sawi chiah lo mahse a hnawl a ti a, hemi chungchang hi ngaihtuah zui zel tul a tih thu sawiin, ngaihtuahtu tur committee awm thei se a that a rin thu House a hrilh a ni.

Chief Minister chuan tunlaihah global village-ah mihring te an chen tawh avangin hnamdang nena inneih pawlhna a thleng chho zel dawn a, tuma dan theih a ni lo tih sawiin, Mizote pawhin thliarkar rilru an put loh a ngai ve tawh a ti a, amah ngei pawhin Mizoram pawn leh India pawnah te Mizonu hnamdang pasal nei an awmna hmuna Mizo awm ve ten an thlamuanpui, mi fel tak tak a hriat teuh thu a sawi bawk a ni.



MHIP

Mizo Hmeichhe Insuihkhawm Pawl MHIP-in The Mizo Marriage and Inheritance of Property (Amendment) Bill, 2026 chu Mizo hmeichhia te tan, a him lo a, a tha tawk lo bawk an ti a, sut a, siamtha leh turin an phut tih an sawi.

Kan corr report lo ngaithla ang.

VC

MHIP General Headquarter-in thuchhuah an siamah chuan tun thla February ni 23-a Mizoram Legislative Assembly-in a pass tak, The Mizo Marriage and Inheritance of Property (Amendment) Bill, 2026 chu Mizo hmeichhia te tan, a him loh leh a that tawk loh avangin ennawn leh ngei ni se an duh tih an sawi a.

Mizo Customary Law Committee-ah MHIP te tel mahse Bill ah erawh chuan rawn emaw hrilh ve an nih loh avangin an pawm lo tih sawiin, MHIP chuan Mizo hmeichhiate tana Dan tha ber tur leh, siamthat ngai te chu an zir Chiang Mek a, he Bill passed tawh hi sut a, ennawn a, siamthat leh turin Assembly an ngen tih an sawi a ni.



ASSEMBLY-RESOLUTION

Vawiin Assembly Session-a Congress MLA Pu C. Ngunlianchunga private member resolution putluh, "Mizoten hmeichhia ti a kan koh thin na hi 'mi nu' ti a thlak ni rawh se" tih chu sawiho a nih hnuah hnawl a ni.

Resolution puluttu, Congress MLA Pu C. Ngunlianchunga chuan Mizorama hnam peng hrang hrang Mara, Lai, Chakma, leh Bru te chuan Hmeichhia tia sawiin lovin an tawng Bible ah ngei pawh Mi Nu tih hlirin an sawi thin a ti a, Mizorama hnam peng hrang hrangten a huhova tawng an inhman tawmah Hmeichhia tih chu a fel lo hle a a hriat thu a sawi a. Hmeichhe chhuahna bul chu hriat ni chiah lo mah se hmanlaiin Lal pakhat chu a hmei lakah a thinur a, " hmeia kara chhia" tih tawngkam a hmang a, hei hi hmeichhe lo chhuahna pakhat niin a lang a ti a, hmeichhia tiha chhia tel chu mawi lo a tih thu a sawiin, inhmuhsitna tawngkam atan hman a nih fo a ti a. Tawngkam dang fanu, tunu, vahnu, monu leh thiannu tihah te pawh nu tih chu an hman fo thin avangin ZPM kaihhruai kalphung sorkar hnuai hmeichhia tia koh thin 'mi nu' tia thlak chu a inhme hle dawna a hriat thu a sawi a ni.

He Resolution hi member hrang hrangin an sawiho hnuah remti lo an tam zawk avangin House chuan a hnawl a ni.

Hemi hnu hian Pu H.Ginzalala private resolution putluh "ZPM Sokrarin Mizoram tana a hnathawhte hi a lawmawm kan ti" tih chu member ten an sawiho hnuah House chuan a pawm a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



LUNGLEI KISAN MELA

Ni hnih awh tur Kut Hna Thawktute Kutpui, "Kisan Mela" buatsaih chu vawiin khan Lungleiah Agriculture & Farmers Welfare Department Secretary Pi Ramdinliani'n a hawng.

Pi Ramdinliani chuan loneitu te tharchhuah tih pun chu Sorkar tum a ni tih sawiin scientist ten loneitu te tih dan an zirtir te chu loneitu ten tha tak a zawm turin a fuih a. Link road thalo chu loneitu te harsatna pakhat a ni tih sawiin Link Road a tam thei ang ber laih tum a ni a ti a. Organic hmang a thlai chin uar a ni dawn a, mizo te thiam zawng ang a thlai chin a ni bawk dawn a, cluster a then a ni a ti. One district one product kalpui mek pawh a hlawhtlin ngei a beisei awm a ti

Lunglei District Agriculture Officer & ATMA Project Director Dr Samuel Lalliansanga chuan Kisan Mela chu kut hna thawktute thawh chhuah hlawk zawk a awm theih nana tun lai thiamna puan chhuah leh inzirtir nan te, sawrkar ruahmanna hrang hrang puanzarna atan te, kut hna thawktute thar chhuah hralhna atan leh kut hna thawktu tha inhriatpuina leh inchawimawina atan te buatsaih a nih thu a sawi.

Lunglei District Kisan Mela kalpui turah hian stall 21 awmin, Agriculture, ATMA, Horticulture, AH & Veterinary, Fisheries, Soil & Water Conservation, Sericulture, KVK Lunglei, ICAR, MzSRLM, NEIDA, SELCO Foundation, Jute Corporation of India, Cadbury leh tualchhung mi kut hna thawktu, thil siam chhuaktu leh lo neihna hmanraw zuartute an inpho chhuak a ni.

He Kisan Mela-ah hian kut hna thawktute thil deh chhuah hrang hrang man man zawka lei theiha chhawp chhuah niin, AH & Veterinary Department leh KVK te'n ran leh thlai hriselna dinhmun endikna (Animal & Plant Health Clinic) an buatsaih nghal bawk a. Ran vaccine leh damdawi hrang hrangte a tul leh remchan dan angin sem chhuah a ni bawk.



KEJRIWAL ACQUITTED

Delhi excise policy kaihnhawih eiruk thubuaiah Aam Aadmi Party National Convenor, Delhi Chief Minister hlui ni bawk, Arvind Kejriwal-a leh Dy Chief Minister hlui, Manish Sisodia-te chu Delhi court-in thiam a chantir a, Court thu tlukna hi vawiin khan Special Judge Jitendra Singh-a'n a puang a, he thubuaia CBI chargesheet thehluh chu finfiahna a awm loh avangin pawm theih a ni lo, a ti a, he thubuaiah inhnamhnawiha puh midang 21-te pawh thiam chantir an ni.

Pu Kejriwal-a chuan mi dik anih thu sawiin dikna-in hnehna a chang, a ti a, ram judiciary kalphung chu a rin tlak tak zet a ni, a ti bawk.

Hetih lai hian CBI chu trial court thu tlukna siam danah lungawilovin High Court-ah thlen nghal a tum a, BJP thupuangtu, Sudhanshu Trivedi-a pawhin finfiahna hmanrua, mobile phone leh SIM card za tel tih chhiat anih avanga Kejriwal-a leh midangte chu thiam chantir niin a sawi a ni.

(NSD)

